

Oslobađajuća presuda za Miodraga Andrića

Nakon što je dana dana 17. marta 1999. godine donošena oslobađajuća presuda za Miodraga Andrića, kome je ponovljeno suđenje za ratne zločine protiv civilnog stanovništva, Ured Visokog predstavnika želi da oda priznanje za korektnost u vođenju postupka i za napredak načinjen na polju međuenitetske sudske suradnje.

Prvo suđenje gosp. Andriću je održano krajem 1996. i tokom 1997. godine i rezultiralo je presudom donešenom 22. avgusta 1997. godine prema kojoj je osuđen na kaznu zatvora od dvadeset godina, za ratne zločine protiv civilnog stanovništva; konkretno, za ubistvo trojice civila s područja Rogatice u junu 1992. godine. Presuda se većim dijelom zasnivala na neosporavanom svjedočenju dvoje očevidaca budući da odbrana nije mogla tačno i u potpunosti prezentirati svoj slučaj zbog odbacivanja suštinskog zahtjeva za izvođenje rekonstrukcije zločina radi provjere svjedočenja dvaju očevidaca. Odbacivanje ovog zahtjeva od strane Suda se zasnivalo na članu 239 (2) Zakona o krivičnom postupku iz tog perioda čime se navodi da se "rekonstrukcija događaja ne može izvesti bez remećenja javnog reda, mira i moralnosti niti ugrožavanja ljudskih života ili zdravlja".

Vrhovnom sudu Federacije je uložena žalba i taj Sud je poništio prvostepenu presudu i naložio da se izvrši ponovno suđenje na osnovu toga što su postojala značajna neslaganja u dokaznom materijalu koji je prikupljen i ispitan na prvostepenom suđenju. Ponovno suđenje je počelo 28. aprila 1998. godine, a ubrzo nakon toga, 20. maja 1998. godine, potpisan je Memorandum o razumijevanju o međuentitetskoj sudskoj suradnji od strane ministara pravde u oba Eniteta. Memorandum o razumijevanju je zamišljen kao privremena mjera

kojom bi se olakšali međuentitetski pravni postupci, uključujući i saslušanje svjedoka u drugom Entitetu i izvođenje rekonstrukcije događaja. Na osnovu ovog Memoranduma, Kantonalni sud u Sarajevu je prihvatio zahtjev odbrane za izvođenje rekonstrukcije događaja u Republici Srpskoj i za saslušanje značajnih iskaza svjedoka koje je predložila odbrana iz Rogatice, uz saglasnost predsjednika Osnovnog suda u Rogatici. Na zahtjev Kantonalnog tužilaštva izvršena je i druga rekonstrukcija događaja radi daljeg razjašnjenja slučaja.

Postupak proveden na ponovnom suđenju je bio primjeren u smislu poštovanja međunarodnih standarda i Evropske konvencije o ljudskim pravima i predstavlja važan korak naprijed u međuentitetskoj suradnji i uspostavljanju vladavine zakona u Bosni i Hercegovini.